

Gaur hauteskunde primarioak egingen dituzte Baionako Merkataritza Ganbaran

Jean Marie Berckmans eta Pierre Durruti dira aurrez aurreko hautagaiak

François Jacquek, hamar urtez Baionako Merkataritza Ganbarako lehendakartzan izan ondoren, bere ondorengoari utziko dio lekua, heldu den azaroaren 21ean egingen diren hauteskundeetan. Patronatuak hautagai bakarra aurkeztu nahi du, eta horregatik Berckmans eta Durrutiren arteko hauteskunde primarioak egingen dituzte. Irabazlea soilik aurkeztuko da hauteskundeetara.

HUR GOROSTIAGA / BAIONA

Hauteskunde primarioak egingen dituzte gaur Baionako Industria eta Merkataritza Ganbaran, heldu den azaroaren 21ean bertan egitekoak diren hauteskundeetan aurrekari gisa. Lehen aldia da Estatuko merkataritza ganbara batean hauteskundeetan aurretik primarioak egiten direna. Patronatuak ez da hautagai bakarra aurkezteko adostasuna iritsi eta, lau hilabeteko negoziaketaren ondoren, Pierre Durruti eta Jean Marie Berckmans izanen dira patronatuaren aurrez aurreko hautagaiak primarioetan. Galtzen duena ez da azaroko hauteskundeetara aurkeztuko, eta bertzeko zerrenda edo hautagairik ez dagoenez, irabazlea Ganbarako lehendakari berria izanen da, seguruenik.

Heldu den azaroaren 21ean, hiru urtero egin ohi den gisan, Merkataritza Ganbarako bulegoko kideen erdiak aldatuko dira hauteskundeetan bidez. Guztira bulegoan 36 kide dira eta beraz teorikoki 18 ziren aldatzekoak, eta bertzeko hainbetez segitu beharko luketenak. Hala ere, segitu behar zutenetarik batek lanbidez aldatu duenez, 17k segituko dute eta 19 aukeratu.



Hamar urtez lehendakartzan izan ondoren Jacquek utzi egingo du kargua.

MIXEL ESTEBAN

Hauteskundeetarako zerrendak heldu den urriaren 12a baino lehenago aurkeztu beharrekoak dira, eta momentuz zerrenda bakarra aurkeztu da. Zerrenda hori patronatuko bi sindikatuak osatu dute, CGPMEk (Enpresa txiki eta ertainen konfederazio nagusia) eta Union Patronalek (Batasun Patronala). 19 izenak aurkeztetakoan —nahiz eta oraindik izen horiek sekretupean eduki—, ez da arazo handirik sortu, baina lehendakartzarako hautagaia proposatzerakoan bai, eta horregatik ekin diote ezohizko prozedurari, primarioak egiteari.

Jean Marie Berckmans Baionako eskualdeko CGPMEko lehendakaria da eta Pierre Durruti Baiona eta Ipar Euskal Herriko Union Patronaleko lehendakaria. Bi sindikatuen arteko ezadostasunak txikiak dira, baina 19 kideko zerrenda osatzeko orduan hainbat arazo izan dituzte pertsonen hautuagatik. Gaur, berriz, lehendakartzarako hautagaia nor izanen den finkatuko dute.

Bozketa sekretua izanen da eta ateak itxita. Hala ere, aurretik

hautagaiak beren programaren berri emanen diete hautesleei. Hautesleak zerrendako 19ak izanen dira, gehi beren karguan aurrera segituko duten 17ak. Gisa honetan segur izanen da heldu den azaroaren 21ean irabaziko duena gaurko garaile bera izanen dela eta, ondorioz, hamar urtez lehendakartzan egon den François Jacqueren ordezkia.

Pierre Durruti Baionako Ford auto etxeko nagusia da, 61 urte ditu eta Baionan sortua da. Teknikari ikasketak egin ondoren, ofizier ikasketak egin zituen eta oso loturik egon da instituzio militarri. «Ganbarako hautesleak gehiago kontuan hartzea» du xedeko EGUNKARIARI erran dionez. Bere asmoa erabakiguneak arazoguneetara «hurbiltzea» da.

Jean Marie Berckmans Baionako Renault auto etxeko nagusia da. Aita flandriarra eta ama baionesa izanki, orain 55 urte sortu zen. Autodidakta, 18 urterekin hasi zen lanean eta gaueko kurtsoak segituz kontabilitateko aditu bilakatu zen.

FMI eta Munduko Bankuaren kontrako manifestaldia egingo da gaur Iruñean

DONOSTIA

Nazioarteko Diru Fondoaren (FMI) eta Munduko Bankuaren politika salatzen manifestaldia izango da gaur Iruñean '50 urte, zoritxarrez!' plataformak deituta. Bi erakundeon urteurrena dela eta Madrilan egiten ari diren bileren aurka protesta egin nahi dute plataformako kideak. Beraien iritziz, «nahiz eta egunotan bi erakundeetatik sekulako zifra jariora botatzen ari diren egia ezin da ezkutatu: herrialde aberatsak

gero eta aberatsago dira eta txi-roak gero eta txiroago; bi blokeak duela 30 urte baino bananduago daude».

Konferentzia ofizialarekin batera Madrilan egiten ari den bi erakundeon aurkako Foro Alternatiboko zenbait partaidek ere manifestaldia egin zuten atzo hirugarren munduko zorra barkatzea eskatzeko. Azkenean poliziak desegin zuen manifestaldia.

Foro Alternatiboko partaideen ustez bi erakundeon politikak «porrot» egin du eta beharrez-

kotzat jotzen dute munduko ekonomia produkzio eta finantza alorretan berregituratzea.

Michel Camdesus FMiko zuzendari gerenteak, bere alde, Espainiako langabezia murrizteko defizit publikoaren jaitzieren aldeko politikak jarraitu behar duela adierazi zuen atzo. Europako Batasunean diru batasuna lortzea «faktore positiboa» izango dela ziurtatu zuen, bateratasunak ekonomi hazkunde orekatua garatzen lagun dezakeela gaineratuz.

**EAEko enpresen
esportazioak % 5
hazi dira**

BILBO

Hamar langile baino gehiago dituzten Euskal Autonomi Elkarteko enpresen % 5 gehitu dituzte esportazioak 1993. urtean, Jon Azua Gasteizko Industria sailburuak atzo Bilbon jakinarazi zuenez. Jon Azuak Euskal Autonomi Elkarteko Industri Katalogoaren aurkezpenean egin zituen adierazpenak.

Katalogoak EAEko 3.524 industri edo zerbitzu enpresen oinarriko datuak jasotzen ditu. Industria sailburuaren ustez, EAEn inbertitu nahi duten enpresentzat ere «baliagarria» izango da argitalpena. Guztira 10.000 ale argitaratu ditu Gasteizko Industria Sailak.

EUSKAL HERRIKO



UNIBERTSITATEA

**IZAERA ELEBIDUNEN IRAKASLE LAGUNEN
ETA BEHINBEHINEKO IRAKASLE TITULARREN
PLAZETARAKO LEHIAKETA PUBLIKOA**

UPV/Euskal Herriko Unibertsitateak, indarrean dagoen Legeriak esleitzen dizkion ahalmenak erabiliz, izaera elebiduneko Irakasle Lagunen plaza-tarako deialdia egiten du, ondoko Sail hauetarako:

- Zuzenbide Konstituzionala eta Administratiboa
- Zuzenbide Eliztarra eta Historikoa
- Ekonomia Aplikatua I
- Finantz Ekonomia I
- Oinarriko Psikologi Prozedurak eta Garapena
- Gizarte-Psikologia eta Portaera-Zientzien Metodologia
- Kimika Analitikoa
- Soziologia
- Soziologia II

Lehiaketa, berorren oinarriekin batera, bai eta plazen ezaugarriak eta euskarazko proben datuak ere, Lehiaketa-Ataleko iragarki-taulan azaltzen da, Errektorategoaren Eraikina, 1. solairua, Leioako Campusa (Bizkaia); Gipuzkoako Campuseko Errektorordetzan: Urbietako kalea, 30, Donostia; eta Arabako Campuseko Errektorordetzan: Manuel Iradier kalea, 46, Gasteiz.

Plaza elebidunen lehiaketa hauetan parte hartu ahal izateko, euskararen jakite-maila ALDEZ AURRETIK frogatu beharko da, ahozko zein idatzizko adierazpenarekin, irakaskuntzaren helburua diren gaiak dagokienez.

EUSKARAREN JAKITE-MAILA FROGATZEKO PROBA hauetan parte hartzeko ESKARIEN aurkezteko epea URRIAREN 3an hasi eta URRIAREN 7ko 13etan amaituko da eta Universidad del País Vasco/Euskal Herriko Unibertsitateko Erregistro Orokorrean aurkeztu beharko dira, Errektorategoaren Eraikina, 1. solairua, Leioako Campusa (Bizkaia) edo lehen aipaturiko Campusetako Errektorordetzan.

Euskararen jakite-maila frogatzeko probak gairatzen dituzten gurakoei ziurtagiria emango zaie, eta lehiaketarako eskariarekin batera aurkeztu beharko dute berori nahitaez. Hizkuntzaren jakite-maila aurreko probaren batetan akreditatu dutenak EUSKARAZKO KABINETAREKIN jarri beharko dute harremanetan, ziurtagiri hori eguneratzeko. Ez da onartuko behar bezala eguneratutik ez dagoen ziurtagiririk.

Lehiaketetan parte hartzeko eskariak behar bezala beteriko instantzia-curriculumen bidez formalizatuko dira (Errektorategoan eta lehen aipaturiko Errektorordetzan emango direlarik), horrekin batera N.A.N. edo pasaportearen fotokopia soila, euskararen jakite-maila egiaztatzen duen ziurtagiria eta curriculumean aipaturiko merezimenduak dokumentuena erantsiz; ez dira erantsi beharko, inola ere ez, dokumentu originalak. Instantziak aurkezteko epea, euskararen jakite-maila frogatzekoaren ondoren izango da, eta 1994.eko URRIAREN 31n hasi eta urte bereko AZAROAREN 4ko 13etan amaituko da eta Unibertsitate honetako Erregistro Orokorrean aurkeztu beharko dira (Leioako Campusa), edo lehen aipaturiko Campusetako Errektorordetzan.

Irakaslegoaren lehiaketetarako instantziak aurkezteko epea amaiturik, Unibertsitateko Errektorategoak gurako onartu eta ez onartuen behin-behineko zerrenda argitaratuko du Lehiaketa-Atalean eta Campusetako Errektorordetzan, bost egunen epea irekiko delarik, zerrenda horren argitarapen datatik hasita errakuntzak zuzentzeko.

Zerrenda hori argitaratuko deneko data Euskal Autonomi Elkarteko prentsan iragarriko da.

Lehiaketa hauen erabakiak Lehiaketa-Ataleko, Campusetako Errektorordetzako eta dagozkien Ikastegietako iragarki-taulatan argitaratuko dira.

Leioan, 1994.eko irailaren 30ean
Errektorea, Juan Jose Goiriena de Gandarias y de Gandarias.